

«ԲՈՒԺԻՉ» ՈՒՆՈՒՆՔ-ՊԱՀՊԱՆԱԿՆԵՐ

ԱՍՏՂԻԿ ԻՍՐԱՅԵԼՅԱՆ

Հայաստանի պատմության պետական թանգարանի № 1 զետեղարանում պահպանվում են մի խումբ ուլունքներ, որոնց XIX դ. և XX դ. սկզբին վերագրվել է հիվանդություններից պաշտպանելու և բուժելու հատկություն: Այս ուլունքները կոչվում են «ուլունք-պահպանակներ», որովհետև արտաքին ձևով նման են ուլունքի և մեծ մասն անցք ունի: Բացառություն են կազմում հինգը, որոնցից մեկը ոսկրից է, առանց անցքի (№ 4805)¹, մյուսը՝ արծաթյա շրջանակով խեցի է (№ 4788), երրորդը նախկինում օգտագործվել է որսիս մատանու ակ (№ 3650) և այլն:

Թանգարանում պահվող ուլունքները 29 հատ են. դրանց ծագման ժամանակաշրջանի մասին մեզ որևէ տեղեկություն չի հասել, պատրաստված են 12 նյութից՝ սաթ, ագաթ, սարգիոն, քաղկեդոն, ծիածանաքար, օնիքս, գիշեր, գլաքար, ոսկր, փայտ, ապակի, հախճապակի: Տարբեր վայրերի հնագիտական պեղումներից գտնվել են բազմաթիվ նմանօրինակ ուլունքներ՝ պատրաստված հիմնականում տեղական նյութերից², իսկ անցյալում ևս ուլունքներին մոգական նշանակություն է վերագրվել, և մարդիկ կրել են դրանք իրենց վրա³: Ազգագրական հետազոտությունները ցույց են տալիս, որ այդպիսի ուլունքներ օգտագործվել են պատմական Հայաստանի բոլոր շրջաններում:

Ուլունք-պահպանակները թանգարանը ձեռք է բերել 1929—1937 թթ. գիտարշավների և Նրևանում կատարված գնումների միջոցով: Դրանց անունները գրի են առնվել այնպես, ինչպես որ օգտագործվել են տվյալ վայրում՝ բարբառային ձևով, արաբերեն, պարսկերեն, թուրքերեն (երբեմն աղավաղված): Միևնույն նյութից պատրաստված զանազան ուլունքներ հաճախ տարբեր նշանակություն են ունեցել և տարբեր նյութերից պատրաստվածները՝ օգտագործվել միևնույն ձևով կամ նպատակով: Մենք դրանք խմբավորում ենք ըստ իրենց կատարած դերի: Այսպիսով, «ուլունք-պահպանակները» բաժանվում են 12 խմբի՝ դեղնախտ, հազ, ուռած գեղձեր, ծմրուկ, վերքեր, օձի խայթածը, թունավորում «բուժող», քթի արյունահոսությունը դադարեցնող, թպղի, աչքի հիվանդություն, ծաղիկ «բուժող» և հիվանդություններից «պաշտպանող» ուլունքներ:

Առաջին խումբը բաղկացած է դեղնախտ «բուժող» երեք ուլունքից, որոնցից մեկն ագաթից է, երկուսը՝ սաթից: Ագաթե ուլունքը (№ 3650), որ կոչ-

¹ Նկարագրվող բոլոր ուլունքների մասին տեղեկությունները վերցված են Հայաստանի պատմության պետական թանգարանի ազգագրության բաժնի մատյաններից: Տեքստում փակագծերի մեջ նշվում են դրանց համարները:

² А. А. Мартиросян, Раскопки в Головино, Ереван, 1954, էջ 84—87:

³ Ж. Д. Хачатрян, Гарни, 5, Ереван, 1976, էջ 107—108:

վում է «փանծահար», բերված է Սասունի Հազո քաղաքից: Սա մոխրագույն է, բնական գծերով լայն քարի երկու կողմերը կոր, ներքևի ու վերևի մասերը՝ «ղիղ կտրվածքով (լայն.՝ 4 սմ., երկ.՝ 3 սմ., հաստ.՝ 0,5 սմ.): Կենտրոնում ունի կախելու համար անցքով ելուստ: Ուլունքը կախում էին վզից՝ մարմնի վրա: Բացի այդ, քարը գցում էին ջրի մեջ, դնում լուսնի դեմ (ամսի 14—18-ին) և երեք օր հաջորդաբար, առավոտյան լույսը շրջված, ջուրը խմեցնում հիվանդին: Հավանաբար, այս ուլունքը նախկինում այլ նշանակություն է ունեցել, որովհետև, ըստ միջնադարյան աղբյուրների, ազաթը օգտագործվում էր թունավորման դեմ⁴:

Սաթե ուլունքներից մեկը (№ 4779) կոչվում է «քյարհամա», որը, մեր կարծիքով, պարսկերեն «քահրուբա»՝ սաթ բառի⁵ աղավաղված ձևն է: Սա մուգ դեղին, կիսաթափանցիկ, շրջանաձև, մի երեսը թեթև կորուսյամբ, մյուսը՝ թեթև կտրվածքով, կտր անցքով ուլունք է (տրամ.՝ 2 սմ, բարձր.՝ 0,6—1 սմ), օգտագործվել է XX դ. սկզբին, Երևանում: Այն կախում էին հիվանդի կրծքին կամ գցում էին ջրի մեջ ու ջուրը խմեցնում:

Սաթե երկրորդ ուլունքը կոչվում է «դեղին քար» (№ 4781): Սա երկարավուն է, մուգ կարմրաշագանակագույն, դեղնավուն փայլուն գծերով (երկ.՝ 1,7 սմ, շրջ.՝ 4 սմ), օգտագործվել է Երևանում: Բորչալուի գավառում դեղնախտը բուժելու համար սաթը ծեծում էին, շորով մաղում ու մի թեյի գլալի չափ ջրի մեջ լուծելով, նախքան ուտելը, հիվանդին խմեցնում⁶: Նոր Բայազետում դեղնախտը դեղին գույնի ուլունքով բուժելու պատճառներից մեկն այն էր, որ կարծում էին, թե հիվանդությունն առաջանում է դրսից տուն եկողներից որևէ մեկի՝ հետը դեղին ուլունք բերելու հետևանքով. ուստի, պետք էր «հակազդել» նույն միջոցով⁷: Որոշակի նշանակություն էր տրվում դեղին գույնին, և դեղնախտով հիվանդի վզից ոսկի էին կախում, որ նա ապաքինվեր⁸:

Սաթի օգտագործումը որպես «բուժման», և, առհասարակ, հմայության միջոց, գալիս է դարերի խորքից: Դեռևս 5—6 հազար տարի առաջ են պատրաստվել այն սաթե հմայական պահպանակները, կոճակները, որոնք գտնվել են քարեդարյան թաղամասներից⁹:

Հայաստանում սաթե ուլունքներ են հայտնաբերվել մ. թ. ա. XIV—XIII դդ.՝ Գեղարոտի թաղամասներից¹⁰, Մեծամորից¹¹, Կարմիր բլուրից¹² և այլն:

⁴ К. П. Патканов, Драгоценные камни, их названия и свойства по понятиям армян в XVII в., СПб., 1873, т. XXXI.

⁵ Б. В. Миллер, Персидско-русский словарь, М., 1953, т. 414.

⁶ «Ազգագրական հանդես», X, 1903, էջ 160.

⁷ Նույն տեղում, XVI, 1907, էջ 46.

⁸ Պատմության թանգարանի ազգագրության բաժնի արխիվ (այսուհետև՝ ՊԹԱՐԱ), Ա. Իսրայելյանի նյութերը, Թալինի շրջան, 1977, տետր № 1, էջ 10.

⁹ А. Е. Ферсман, Очерки по истории камня, т. 1, М., 1954, էջ 295.

¹⁰ А. А. Мартиросян, Армения в эпоху бронзы и раннего железа, Ереван, 1964, էջ 90—91.

¹¹ Է. Վ. Խաչատրյան, Կ. Հ. Մկրտչյան, Է. Ս. Պարսամյան, Մեծամոր, Երևան, 1973, էջ 179.

¹² Б. Б. Пиотровский, Кармир-блур, III, Ереван, 1955, էջ 51.

Միջին Ասիայում ևս, մինչև վերջերս, սաթե ուղունքներին վերագրվում էր դեղնախտ «բուժող» և նրանից պաշտպանող նշանակություն¹³։

Քննվող ուղունքներից հաջորդը երեխաների հազն էր «բուժում» (№ 4783)։ Այն օգտագործում էին Երևանում։ Սա գնդաձև, սպիտակ հախճապակուց է, վրան կապույտ, վարդագույն, դեղին ծաղիկներով, ոսկեգույն արիքաձև գծերով (շրջ.՝ 3,5 սմ)։ Ուղունքը գցում էին ջրի մեջ և ջուրը խմեցնում։

Գրեթե բոլոր ուղունքները գցում էին ջրի մեջ ու ջուրը խմեցնում հիվանդին, որովհետև ջուրը ևս համարվում էր բուժող միջոց։ Նրան մոգական ուժ ու զորություն վերագրելը կապված էր ջրի պաշտամունքի հետ։ Բանահյուսության մեջ հաճախ հանդիպում է «անմահական ջրի» գաղափարը, որն ըստ ժողովրդական պատկերացման և՛ հիվանդություն էր «բուժում», և՛ արգասավոր ներգործություն ունենում¹⁴։

Ուռած գեղձեր «բուժող» ուղունքը (№ 4778) երկարավուն է և կոշվում է «խիար»։ Օգտագործվել է Երևանում, XIX դ.։ Սա դեղին գույնի տարրեր երանգներով, մի կողմը մինչև կեսը հարթ հատած, օնիքսե ուղունք է (երկ.՝ 2,8 սմ, շրջ.՝ 4,6 սմ), որը դնում էին գեղձի վրա ու կապում։

Ստեփանավանի Շահնազար գյուղում օգտագործվող «ծմրուկի քար» կոշվող գլաքարե ուղունքը (երկ.՝ 4,2 սմ, շրջ.՝ 7 սմ) «բուժում» էր «ծմրուկ»¹⁵ հիվանդությունը։ Սա ևս (№ 4931) կանաչ ու մոխրագույն երանգներով երկարավուն քար է, որը կախում էին օրորոցից՝ մանկան կրծքի մոտ, կամ գցում էին ջրի մեջ և ջուրը խմեցնում երեխային։ Մարահյուներ նաև կախում էին երեխայի վզից կամ կապում բազկին, կարծելով, թե ծմրուկները կշորանան¹⁶։ Այս հիվանդությունը «բուժում» էին նաև «ծմրուկ» կոշվող սաղափե խեցիով, որը մեծ մասամբ կարում էին հիվանդ երեխայի անկողնուն¹⁷։

Հաջորդ խմբին պատկանող ուղունքները կոշվում են «իլանջղ» կամ «իլանջուղ»¹⁸։ Սրանցից երկուսը «իլանջղ» կամ «իլահջաղ», վերքերը «բուժելու» համար էին։ Հայաստանի զանազան շրջաններում այս հիվանդությունը տարբեր ձևերով են պատկերացրել։ Հարբում, օրինակ, կարծում էին, թե վերքի մեջ օձանման թելիկներ կան և մի շարք ժողովրդական դեղամիջոցների հետ մեկտեղ «իլանջուղի ուղունք» էին դնում վերքի մեջ¹⁹։ Ախալքալաքում իլանջուղը համարվում էր մսի և կաշվի արանքում պտտվող քամի և ուղունքը շփում էին մարմնին. որտեղ որ կաշում էր, իբր, այնտեղ էր հիվանդությունը, և քարը դնում էին այդ մասի վրա²⁰։ Իլանջուղը համարվում էր նաև թարա-

¹³ «Домусульманские верования и обряды в Средней Азии», М., 1975, էջ 293։

¹⁴ «Հայ ժողովրդական հեքիաթներ», հ. 3, Երևան, 1962, էջ 284, 290։

¹⁵ Մանր փշանման պղուկներ, որ դուրս են գալիս երեխայի վրա, հատկապես թիկունքին (Վ. Առաքելյան, Ժամանակակից հայոց լեզվի բացատրական բառարան, հ. 2, Երևան, 1972, էջ 686)։

¹⁶ Ստ. Մալխասյան, Հայերեն բացատրական բառարան, հ. 2, Երևան, 1944, էջ 345։

¹⁷ Վ. Առաքելյան, նշվ. աշխ., էջ 686։

¹⁸ «Իլանջուղ», կամ «օձացավ» կոշվող հիվանդությունը «կարմիր քամին» է՝ Erysipelas («Ազգագրական հանգես», Ե, 1899, էջ 167), Ստ. Մալխասյան, նշվ. աշխ., հ. 4, էջ 606։

¹⁹ «Ազգագրական հանգես», Ե, էջ 167։

²⁰ Վ. Բոսյան, Ախալքալաքի ժողովրդական բժշկության ձևերը, անձնական արխիվ, դաշտային տետր № 118, էջ 9։

խոտ վերք առաջացնող որդ, և եթե այն «էգ» էր, մարդը մահանում էր, եթե «որձ»՝ «բուժվում» էր 30—40 տարում: «Բուժվելու» համար հատուկ ուլունք էին դնում վերքի մեջ, որպեսզի որդը մտներ նրա մեջ և ուլունքի հետ միասին դուրս գար²¹:

Համշենահայերի մոտ տարածված էր այն կարծիքը, թե «իլոնջուղ» էր առաջանում, երբ մարդը պատահաբար ոտը դնում էր սատկած օձի կամ նրա կմախքի վրա: Դա կոկորդի և ականջի ցավ էր «առաջացնում», որը «բուժում» էին «իլոնջուղի քար» դնելով ցավող մասի վրա: Այն, իբր, ինքն իրեն կաշում ու բուժում էր: Նրբեմն էլ քարը կապում էին կոկորդին²²: Սասունցիներն այս հիվանդությունը «խլուրդ» էին անվանում. երբ վերքը «էգ» էր, հիվանդին էգ խլուրդ էին ուտեցնում, իսկ երբ «որձ»՝ որձ խլուրդ²³:

Թանգարանում պահվող «իլոնջուղի» մի ուլունքը (№ 4812) սաթից է, երկարավուն, մի մասը կիսաթափանցիկ, անցքի մոտ ճեղքով (երկ.՝ 2,3 սմ, շրջ.՝ 5,5 սմ): Այն օգտագործում էին Ստեփանավանի Շահնազար գյուղը գաղթած ալաշկերտցիները՝ «էգ» վերքը «բուժելու» համար: Երկրորդ ուլունքը (№ 4805) ոսկրից է՝ գնդաձև, մի ծայրը սուր, վերևում ու ներքևում մեկական, մեջտեղը՝ զույգ փորագիր շրջանագծերով, սուր ծայրին և նրա հակառակ՝ կլոր մասի մեջտեղում փոքր փոսիկներով (շրջ.՝ 6,5 սմ, երկ.՝ 1,8 սմ): Երևանում սա դնում էին վերքի մեջ, իբր, այնտեղ գտնվող որդերը դուրս հանելու համար: Շահնազար գյուղից բերված մեկ այլ ուլունք (№ 4815) և՛ իլանջուղ էր «բուժում», և՛ օձի խայթածը: Սա երկարավուն, բաց ու մուգ շագանակագույն, սպիտակ գծերով ազաթ է (շրջ.՝ 6,1 սմ), որը դնում էին վերքի վրա: Հաջորդ երկու «իլանջուղ» կոշվող ուլունքները միայն օձի խայթոցը «բուժելու» նպատակով էին օգտագործվում: Առաջինը ձեռք է բերվել Երևանից: Սա արծաթյա շրջանակով սպիտակ, ձվաձև, պարուրաձև փորագրանախշով խեցի է (№ 4788), շրջանակը երիզված է ատամնավոր նախշերով: Համանման խեցիներ օգտագործում էին նաև համշենահայերը²⁴, Երկրորդը՝ Սասունի Հազո քաղաքից է. ձվաձև, մի երեսը հարթ, սպիտակ, մյուսը՝ դեղին ու սպիտակ, ուռուցիկ մակերեսով ազաթ (№ 3659), որը դրված է եղել մատանու ակնաբեռի մեջ (երկ.՝ 1,6 սմ, լայն.՝ 1,3 սմ): Քարը մի քանի անգամ տաքացնում էին, հիվանդի վերքը դադում այնքան, մինչև ուռուցքն իջնել կամ գցում էին ջրի մեջ ու ջուրը խմեցնում հիվանդին: Այս խմբի ուլունքներից երկուսը ազաթից են (№ 4815, № 3650): Տվյալ դեպքում ազաթի հատկությունները համընկնում են Մ. Այրիվանեցու և մասամբ՝ Ե. Կիպրացու տված տեղեկություններին: Մ. Այրիվանեցին (XIII դ.) գրել է. որ ազաթը օձերի և կարիճների թույնի դեղ է²⁵, իսկ Ե. Կիպրացին²⁶ (IV դ.) հաղորդում է, որ այն մարդկանց փրկում է սողուններից: Ա. Դավրիժեցու վկայությամբ օձի խայթածը բու-

21 ՊԹԱՐԱ, Պտղնի, 1976, տետր № 1, էջ 5:

22 ՊԹԱՐԱ, Սուխումի, 1976, տետր № 1, էջ 9, տետր № 2, էջ 15:

23 ՊԹԱՐԱ, Թալինի շրջան, 1977, տետր № 1, էջ 19:

24 ՊԹԱՐԱ, Սուխումի, 1976, տետր № 2, էջ 15: Ա. Դավրիժեցին ևս նշում է այսպիսի «օձի քար», որը 8 օր պահում էին վերքի վրա, մինչև առողջացնելը («Պատմություն Առաքել վարդապետի Դավրիժեցու», Վաղարշապատ, 1884, էջ 457):

25 К. П. Патканов, *нշվ. աշխ.*, էջ XXXI:

26 «Сборник материалов для описания местностей и племен Кавказа», Тифлис, вып. XXIV, 1898, էջ 10.

ժում էին նաև «օձաքարով»։ Այն քսում էին փորձաքարին, փոշուց մի քիչ խմեցնում խայթվածին, մնացածը դնում էին վերքի վրա, և վտանգը նույն օրն անցնում էր²⁷։ Ա. Դավրիժեցու նկարագրած «օձաքարը» բնական էր, և իր պարունակած բաղադրանյութերի պատճառով զանազան գույներ էր ունենում։ Իսկ թանգարանում պահպանվող «օձաքարը» (№ 4795) արհեստական է՝ պատրաստված հախճապակուց, օգտագործվել է Երևանում։ Այն գնդաձև է, սպիտակ, պարուրաձև գծերով (շրջ.՝ 3,9 սմ)։ Այս ուլունքը կարում էին հագուստին, որպեսզի այն կրողը օձի խայթոցից «պաշտպանվեր» (հատկապես նրանք, ովքեր գնում էին Երուսաղեմ՝ հաջի դառնալու)։

Ավանդության համաձայն, Վասպուրականում օձի թույնը ոչնչացվում էր «օձաուլնիկով», որն օձերի թագավորի գլխին էր լինում, մթության մեջ լույս էր սփռում շուրջը և բուժում էր բոլոր տեսակի հիվանդությունները²⁸։ Նույնանման կարծիք կար համշենահայերի մոտ, միայն այն տարբերությամբ, որ դա ոչ թե «օձաուլնիկ» էր, այլ օձերի թագավորի գլխի եղջյուրը և բացի հիվանդություններ բուժելուց, օգտագործվում էր նաև գուշակության համար²⁹ և կոչվում է «պանզեհիր», նաև՝ «օցու կոտեշ» կամ «օցոն կոտեշ» («օձի եղջյուր»)։ Որպեսզի համոզվեն, որ պանզեհիրը թունավոր չէ, այն քերում, լցնում են մածնի մեջ և տալիս կատվին։ Նթե կատուն չսատկեց, պանզեհիրի փոշին խառնում են ջրի մեջ և խմեցնում թունավորվածին։

Իրականում, պանզեհիրը շնաձկան ատամ է, որը կարելի է գտնել արտերում, անգամ կրաքարի մեջ։

Հայաստանի տարբեր շրջաններում օձի խայթածը բուժելու համար տարածված էր «փազահրի» կոչվող ուլունքը։ «Փազահրին», «փանզահր» անվան տարբերակն է և գալիս է պարսկերեն «փաղզահր» կամ «փալզահր» բառից։ Սրա առաջին նշանակությունն է «հակաթույն», երկրորդը՝ քարի անունն է³⁰։ Ա. Դավրիժեցին այն անվանում է «թունադեղ»³¹։

Փազահրի առանձնահատկությունն այն է, որ սա առաջանում է (բացի լեռնային ապառներից) որոշ կենդանիների՝ հատկապես վայրի այծերի օրգանիզմում և հանդես է գալիս տարբեր բաղադրություններով։ «Փազահր» է կոչվում նաև էշի, ձիու և այլ կենդանիների ծնոտի տակ առաջացող ուռուցքը։ Կենդանու սատկելուց հետո այդ ուռուցքը հանում էին, լվանում և չորացնում։ Հարձ գավառում, երբ մարդ կամ որևէ կենդանի բույսից թունավորվում էր, փազահրը ջրի մեջ տրորելով խմեցնում էին իբրև դեղ։ Որոշ շրջաններում ամենալավ փազահրը համարվում էր էշի ծնոտից հանվածը³²։

Ա. Դավրիժեցին փազահրի մասին գրում է. «Թե զինքն ըռաղիանի ջրով տրորեն և օժեն օձահարի օգտէ, և յայն պահն զցան խաղաղացնէ, և օգտէ ամենայն զազանահարի և զշարութիւնն խափանէ, և թե ԺԲ դարէ քաշ տան. օգտէ սրտին, վատուժութեան և անձինն ուժ տայ լաւ... ով ամեն օր ասկից կես

27 Առաքել Դավրիժեցի, էջ 457։


28 «Ազգագրական հանդես», XXV, 1914, էջ 60։

29 ՊՔԱՐԱ, Սուխումի, 1976, տետր № 2, էջ 15։

30 «Персидско-русский словарь», т. I, М., 1970, էջ 259։ Համշենցիների «պանզեհիր» («օցու կոտեշ», «օցոն կոտեշ») և նրա օգտագործման մասին տեղեկություններ մեզ հաղորդել է Հ. Կարազյոզյանը։

31 Առաքել Դավրիժեցի, էջ 602—603։

32 «Ազգագրական հանդես», Ծ, 1899, էջ 169։



1



2



4



3



5

դանկ ուտէ, խլսի յամենայն շար վտանգէ՝ և յամենայն մահացու դեղուց և տաք բնութեան էլ օգտէ...»³³:

Հալաստանի պատմութեան պետական թանգարանի ժողովածուի փա-
ղահրը նեֆրիտից է³⁴, ձվաձև, փոքր բարձրութեամբ, մուգ կանաչ, մի երեսին
շրջանաձևի և ալիքաձև գծերի հետքերով (№ 4787): Երկու կողմից ուղիղ հատ-
ված քարի մեջ բնական, մուգ խալեր կան, անցքը լայնակի է (երկ.՝ 2,1 սմ,
բարձր.՝ 0,5 սմ, լայն.՝ 1,9 սմ): Երևանում սա քսում էին քարին և փոշին
խմեցնում օձից խայթված մարդուն:

Թունավորման դեմ օգտագործված ուլունքները երեքն են: Առաջինը
ազաթե կլոր, մոխրագույն, կանաչավուն ու դեղնավուն գծերով, անցքով քար է
(№ 4782, շրջ.՝ 5 սմ), որը երևանում մանրացնում ու խմեցնում էին թունա-
վորվածին: Երկրորդը կոշվում է «դեղթափ» (№ 4811): Սա սպիտակ-մոխրա-
գույն ֆոնի վրա կանաչադեղնավուն բնական նախշերով, երկար, մի կողմն
ուղիղ հատված, մյուսը՝ կոր, երկայնակի անցքով օնիքսե ուլունք է, որը Նահ-
նազար գյուղի բնակիչները (նախկին ալաշկերտցիներ) զցում էին ջրի մեջ
և խմեցնում էին Վանդին (երկ.՝ 2,7 սմ, շրջ.՝ 3,8 սմ): Երրորդը նույնպես կոշ-
վում է «դեղթափ» (№ 4776): Սա կլոր, բաց մանուշակագույն, մոխրագույն,
դեղնավուն գծերով, անցքով ուլունք է, որը նույնպես ջրի մեջ զցելով ջուրը
տալիս էին մարդկանց, իսկ ավելի հաճախ՝ կենդանիներին (նկ. 1):

«Դեղթափ» էր կոշվում այն գնդաձև, գունավոր, փայլուն քարը, որն
«ընկնում էր երկնքից» անձրևի ու կարկուտի հետ: Բայց նրա «բուժիչ» հատ-
կություններն ստուգելու նպատակով այն զցում էին կաթի մեջ, և եթե կաթը
դրանից մակարդվում էր, նոր միայն համարվում էր դեղթափ³⁵: Երկնքից
ընկնող քարի գաղափարը կապված էր քարի երկնային ծագում ունենալու ժո-
ղովրդական պատկերացման հետ³⁶: «Դեղթափի» ուլունքով «բուժում» էին
նաև աչքի հիվանդությունները³⁷:

Հաղո քաղաքից բերված՝ քթի արյունահոսությունը «դադարեցնող» քարը
(№ 3650) կոշվում էր «արյան քար» (նկ. 2), որը ձվաձև, տափակ, սև գիշե-
րաքար է: Սրա դրսի երեսին Ղուրանից մի հատված է փորագրված³⁸, Քարը
տաքացնում էին, հոսող արյան կաթիլը վրան կաթեցնում և կպցնում մարդ-
կանց երկու հոնքերի արանքում:

«Թալի» կոշվող ուլունքները երեքն են, որ օգտագործվել են Ախալ-
քալաքում՝ բուժող մի թելի վրա անցկացված (թեև այժմ առանձին համար-
ներով են պահվում): Մեկն օնիքսից է (№ 4773), սպիտակ և դեղին նրանգ-
ներով, երկարավուն, մի կողմն ուղիղ հատված՝ վրան հաղիվ նշմարվող զիգ-
զագ գծերով ու կետիկներով (երկ.՝ 4 սմ): Հաջորդը ևս օնիքսից է (№ 4774),

³³ Առաքել Դավրիժեցի, էջ 602—603:

³⁴ Նեֆրիտը դեռ շատ վաղուց համարվել է դեղամիջոց և դրանով բուժել են հատկապես
երիկամները: Այստեղից է դալիս հունարեն անվանումը՝ νεφροσ—երիկամ (ΕΣΘ, հ. 29, էջ 505):

³⁵ Թալիքիների համոզմամբ և՛ դեղթափը, և՛ ծաղկի քարը, և՛ թալի ուլունքը երկնքից
էին ընկնում (ՊԹԱՐԱ, Թալին, տետր № 1, էջ 21, 17):

³⁶ «Академия наук СССР, 45, Академику Марру», М. —Л., 1935, էջ 574:

³⁷ ՊԹԱՐԱ, նույն տեղում:

³⁸ Ղուրան, Թարգմ. արաբերենից Աբր. Ամիրխանյանց, Վառնա, 1909, 112 սուրբ Ալ-
բուլաս (էջ 602):

կանաչ, դեղին, սպիտակ բնական նախշերով. երկարավուն (երկ.՝ 4 սմ): Երրորդը փայտից է (Ն. 4806), գնդաձև, անցքով (շրջ.՝ 7 սմ): Հղի կանայք ինն ամիս այս ուղունքները կրում էին իրենց վզին, իսկ ծննդաբերելուց հետո՝ դնում երեխայի բարձի տակ, որպեսզի նա «շթաղոտեր»: «Թպզ»³⁹ կոչվող հիվանդության մասին պատկերացումը մեկ անգամ ևս հաստատում է, որ ժողովուրդը նախկինում հիվանդությունը ընկալել է որպես շար ոգու անձնավորում: Թպզը տարբեր ձևերով են պատկերացրել. մի դեպքում այն գորտի տեսքով շար ոգի էր, որը մտնելով հղի կանանց արգանդը, թունավորում էր սաղմը, և նորածինը կամ մեռած էր ծնվում, կամ շափազանց սակավակյաց էր լինում: Այս «շար ոգու» ազդեցությունը «ենթարկված» կինը «թաղոտ» էր կոչվում: Վասպուրականում հաճախ ճահիճներից գորտեր էին բռնում, թալիսմաններ պատրաստում, որոնք հղի կանանց պաշտպանում էին՝ թաղիներից⁴⁰: Այդ նույն նպատակով գորտանման զանազան զարդեր էին պատրաստում: Եղեգնաձորի Շատին գյուղի ընտանիքներից մեկում մինչև վերջերս էլ երեխայի օրորոցից կախում էին XIX դ. պատրաստված, 16 սանտիմետրանոց, ամբողջ մակերեսը մանր ուղունքներով զարդարված, մեջքին շեղանկյուն նախշերով գորտ (նկ. 3):

Վ. Բդոյանը նշում է, որ գորտը նախապես պաշտվել է իբրև տոտեմ, իսկ տոտեմիզմի անկումից հետո՝ նոր ֆունկցիաներ է ստացել, որոնցից են մայրություն և մանկության պաշտպանությունը: Սա արտահայտվում է հետևյալ սովորություններով. Արագածի հարավային ստորոտում մեծ, գորտանման բնական քար կա: Այդտեղ էին գալիս չբեր կանայք՝ որդի ունենալու նպատակով և թաղի հիվանդություն ունեցողները՝ երեխայի մահը կանխելու ակնկալությամբ⁴¹:

Թպզը պատկերացվում էր նաև որդի տեսքով, որը ճանկեր ուներ և բռնում էր երեխայի, նրա հոր կամ մոր լյարդը: Նրանից ազատվելու համար նորածին երեխայի մարմնին, շուրթերին ու ականջներին մեղր էին քսում և երեք-չորս օր կուրծք չէին տալիս: Քաղցից նեղվելով, իբր, թպզը դուրս էր դալիս, որպեսզի մեղրն ուտեր: Այդ ժամանակ նրան բռնում էին և երեխային փրկում⁴²: Այնուհետև, թպզը դնում էին տուփի մեջ և պահում: Երբ ուրիշ կանայք պատրաստվում էին երեխա ունենալ, թպզը տրորում էին, լցնում ջրի մեջ և խմեցնում նրանց: Թպզից ազատվելու համար նաև գիր էին անել տալիս⁴³ «կախարդներին» և երբ սրա ազդեցությամբ կինը սկսում էր որձկալ, աշխատում էին նրա բերանը կրակի վրա պահել, որպեսզի երեակայական որդն ընկներ նրա մեջ ու այրվեր:

39 Թպզա կամ Թպզ—1. նորածիններին խեղդող երեակայական մի էակ. 2. մանուկների մի տեսակ մահացու հիվանդություն, որ և «թպզի», սրանից էլ թպզոտ՝ «թպզի հիվանդությամբ բռնված» (Հ. Աճառյան, Հայերեն արմատական բառարան, հ. Բ, Երևան, 1926, էջ 1330):

40 «Ազգագրական հանդես», XXV, 1914, էջ 59:

41 «Աշխատություններ Հայաստանի պետական թանգարանի», հ. 3, Երևան, 1950, էջ 7, 9:

42 Սրա զուգահեռ երևույթը կարելի է դիտել աֆրիկյան որոշ ցեղերի մոտ, երբ շար ոգուն կերակուր էին դոհաբերում, որպեսզի նա դուրս գար և ուտեր (Дж. Фрезер, Золотая ветвь, М., 1931, էջ 260—261):

43 Թպզը հիշատակվում է գրավոր թալիսմաններում (А. А. Одабашян, Народные верования армян, по материалам рукописных талисманов XIV—XIX вв. («Кавказский этнографический сборник». 6. М., 1976, էջ 117):

Հարբում գոյութիւն ունեւ այն համոզմունքը, որ թաղոտութիւն է առաջանում այն ժամանակ, երբ որեւէ մեկը, դիտմամբ, թաղի ուլունքը հղի կնոջ վրա պահած, ձեռքի մեջ սեղմում էր⁴⁴, Հետեաբար, թաղը «բուժելու» համար թաղի ուլունք էր անհրաժեշտ լինում: Հավատում էին, թե կինը կարող է թաղոտել նաև այն դեպքում, երբ մի ուրիշ՝ 40 օրը չլրացած երեխայի մայր, իր երեխայի շորերն էր բերում կամ ուղղակի դալիս էր նրա մոտ⁴⁵:

Աչքի հիվանդութիւն «բուժող» քարը (№ 3650) կոչվում է «շահագի քար»: Ագաթի, գնդաձև (շրջ.՝ 5,5 սմ) այս ուլունքն այնպես էին կախում գլխարկից, որ աչքին մոտ լինելու Ուլունքը բերվել է Հագո քաղաքից: Ի դեպ, Թալինի շրջանում բնակվող սասունցիների վկայութեամբ աչքի հիվանդութիւնը «բուժում» էին նաև կարմիր, գնդաձև ուլունքով, որը կրում էին աչքերի մոտ⁴⁶, Ինչպես հաղորդում է Ա. Դավրիժեցին, աչքի հիվանդութիւն բուժող քար էր համարվում նաև «գիշերը»⁴⁷:

Թանգարանում պահպանվող ուլունքներից երկուսը՝ «կախարդական քարը» (№ 4809) Մեզրու շրջանի Լիճք գյուղից, և «բուժիչ» քարը (№ 4775, օգտագործման վայրն անհայտ է) որոշակիորեն հայտնի չէ, թե որ հիվանդութեան դեպքում են օգտագործվել: Առաջինը ագաթից է (շրջ.՝ 6,7 սմ), երկրորդը՝ քաղկեդոնից (երկ.՝ 4 սմ, շրջ.՝ 7,7 սմ): Երկուսն էլ գցում էին ջրի մեջ ու ջուրը խմեցնում հիվանդին:

Քննվող հաջորդ ուլունքը (№ 4780) օգտագործվում էր Երևանում և հիվանդութիւններից ու պատահարներից «պաշտպանելու» նշանակութիւն ունեւ: Այն ապակուց է, երկարավուն, սպիտակ շրջանակների մեջ կանաչ ու կարմիր պուտերով (երկ.՝ 1,2 սմ, շրջ.՝ 4,2 սմ), կոչվում է «աչիչ ուլնիկ», նման է Թանգարանի որոշ «աչքի ուլունքներին», բայց չար աչքի դեմ չի օգտագործվել:

Սև, պրիզմայաձև, բոլոր ութ անկյունները հատած գիշերաքարի ուլունքը (№ 4803, երկ.՝ 2 սմ, լայն.՝ 1,5 սմ) Մոկսում կապում էին հիվանդ ոչխարի վզից կամ ջրի մեջ էին գցում և ջուրը խմեցնում (հիվանդութեան անունը նշված չէ):

Հաջորդ ուլունքներից յոթը «բուժել» են ծաղիկ հիվանդութիւնը: Սրանցից վեցը ոչխարների համար էին, մեկը՝ (№ 4928) նշված չէ՝ մարդու համար էր, թե՛ ոչխարի (նկ. 4): Վերջինս գնդաձև է, պատրաստված սև ապակուց, որի վրա դեղին վանդակներում կարմիր ու սպիտակ պուտեր կան (շրջ.՝ 2,7 սմ): Օգտագործման վայրը հայտնի չէ: Ոչխարի «ծաղկի ուլունքներից» երկուսը կոչվում են «ծաղկի հան»: Առաջինը (№ 4814) գնդաձև է, բաց դեղնամոխրագույն: Պատրաստված է քաղկեդոնից (շրջ.՝ 5,2 սմ): Երկրորդը (№ 4813) ծիածանաքարից է, գնդաձև, կարմրավուն, մի մասը սպիտակ (շրջ.՝ 5,7 սմ, նկ. 5): Երկուսն էլ ձեռք են բերվել Շահնազար գյուղից (նախկին ալաշկերտցիներից): Դրանք գցում էին ջրի մեջ, այդ ջրով լվանում կենդանու աչքերը, ապա ջուրը խմեցնում նրան⁴⁸: Երրորդ ուլունքը (№ 4804) սար-

⁴⁴ «Աղագրական հանդես», Ե, էջ 121—122:

⁴⁵ ՊԹԱԲԱ, Թալին, տեսիր № 1, էջ 23:

⁴⁶ ՊԹԱԲԱ, նույն տեղում, էջ 15:

⁴⁷ Առաջինը Դավրիժեցի, էջ 594:

⁴⁸ Մուշի էրիշտեր գյուղի նախկին բնակիչներից ոմանք վկայում են, որ Սասնա մոտ մի

դրոնից է, երկարավուն, կաթիլանման. վերևի մասն ուղիղ հատած (երկ.՝ 3 սմ, լայն.՝ 1,5 սմ—0,8 սմ): Մոկսում այն կախում էին կենդանու վզից կամ ջուրն էին խմեցնում, Չորրորդ (№ 4932) ուլունքն օգտագործվում էր նույն վայրում և նույն ձևով: Այն ծիածանաբարից է, ձվաձև, նարնջագույն, մի կողմը հարթ, մյուսն՝ ուռուցիկ (երկ.՝ 1,5 սմ, լայն.՝ 1 սմ): Հաջորդը (№ 3652) արհեստական քար է, գլանաձև, սև ֆոնի վրա սպիտակ, կամարաձև նախշերով, կարմիր, ուռուցիկ, կլոր կեաներով: Ախալքալաքի շրջանի Կարծախ գյուղում այն գցում էին ջրի մեջ, ջուրը խմեցնում ոչխարին և քսում նրա աչքերին (րարձր.՝ 2 սմ, շրջ.՝ 7,5 սմ): Վեցերորդը, որ կոչվում է «ծաղկի ուլունիկ» (№ 4798), սաղկեդոնից է, կլոր, շագանակագույն, գարշնագույն և սպիտակ-կապտավուն գծերով (շրջ.՝ 5,2 սմ): Սա Գավաշում կախում էին ոչխարի վզից, կամ էլ գցում էին ջրի մեջ և ջուրը խմեցնում, Ոչխարների ծաղիկ հրվանդանային ժամանակ պտուղը չվիժելու համար, «թաղի ուլունքը» գցում էին ջրի մեջ և այն խմեցնում նրանց, իսկ որպեսզի ոչխարն ընդհանրապես ծաղիկով չհիվանդանար, «ծաղկահալուն» էին կախում գոմի պառից կամ սյունից⁴⁹:

Տարբեր նյութերից պարաստված ուլունքներին վերագրվող հատկությունները չէին սահմանափակվում հիվանդություններ «բուժելով» և նրանցից պաշտպանելով: Դրանց, որպես հմայական պահպանակների, բազմաթիվ այլ նշանակություններ են տրվել, ինչպես օրինակ՝ գազաններից, կայծակից, թշնամուց պաշտպանելը, հաջողություն, երջանկություն բերելը և այլն: Այսօր հիշյալ հավատալիքների վերապրուկներն են միայն պահպանվել, որոնց հետազոտումը պատմագիտական նշանակություն ունի:

«ЛЕЧЕБНЫЕ» БУСЫ-ОБЕРЕГИ

АСТХИК ИСРАЕЛЯН

Резюме

С древнейших времен камням придавались различные магические свойства, о чем свидетельствуют многочисленные бусы, найденные при археологических раскопках.

Коллекция бус из янтаря, агата, сердолика, халцедона, опала, оникса, гагата, гальки, кости, дерева, стекла и фаянса хранится в Государственном музее истории Армении. Они были распространены в XIX—XX вв. на территории всей Армении.

Согласно народным верованиям этого периода, бусы, изготовленные из указанных материалов, «лечили» людей и скот от разных болезней. Некоторые из них «выполняли» профилактические функции. Бусы рассматриваемой коллекции использовались для «лечения» желтухи, кашля, опухолей, ран, глазных заболеваний, оспы, отравления, змеиного укуса и при болезни «тпха».

⁴⁹ ժայռ կար, որից քար էին պոկում, աղում և աղի հետ խառնելով տալիս էին ծաղիկով հիվանդ ոչխարին: Սա կոչվում էր «ծաղկի քար» (ՊԹԱՐԱ, Թալինի շրջան, տետր № 1, էջ 28—29)։

⁴⁹ նույն տեղում, էջ 6, 8։